

摘藻堂四庫全書薈要

經部

欽定四庫全書薈要

經部

春秋左傳始末卷三

詳校官原任侍講

臣王燕緒

欽定四庫全書薈要卷一千一百九十九 經部

春秋左氏傳事類始末卷三 宋 章沖撰

襄公

十七年

宋子罕止築臺者之謳

宋皇國父為大宰為去平公築臺妨於農收子罕請俟
農功之畢公弗許築者謳曰澤門之皙實興我役邑中
之黔實慰我心子罕聞之親執扑以行築者而扶其不

勉者曰吾儕小人皆有闔廬以辟燥濕寒暑今君為一臺而不速成何以為役謳者乃止或問其故對曰宋國區區而有詛有祝禍之本也

齊晏桓子大夫而行士喪禮

齊晏桓子卒晏嬰麓緇斬苴經帶杖菅屨

苴麻之有子者取其鹿

食鶩居倚廬寢苦枕草

此與士喪禮略同其異唯枕其草然枕由亦非喪服正文

老曰非大夫之禮也曰唯卿為大夫

十九年

齊崔慶之亂

齊侯娶於魯曰顏懿姬無子其姪鬻聲姬生光以爲大子諸子仲子戎子嬖仲子生牙戎子請以爲大子許之仲子曰不可廢常不祥聞諸侯難光之立也列於諸侯矣今無故而廢之是專黜諸侯而以難犯不祥也君必悔之公曰在我而已遂東大子光使高厚傅牙以爲大子夙沙衛爲少傅齊侯疾崔杼微逆光疾病而立之光殺戎子尸諸朝非禮也婦人無刑雖有刑不在朝

市夏五月靈公卒莊公即位執公子牙于句瀆之丘以

夙沙衛易己衛奔高唐以叛秋崔杼殺高厚而兼其室

書曰齊殺其大夫從君於昏也慶封圍高唐弗克冬齊

侯圍之見衛在城上號之乃下問守備焉以無備告揖

之乃登高唐人殖綽工倭會夜縋納師醢衛于軍二

十一年齊侯使慶佐爲大夫復討公子牙之黨執公子

買于句瀆公子鉏來奔叔孫還奔

言莊公斥親族以成崔慶之勢終有弑殺

之禍晉欒盈出奔楚冬會於商任錮欒氏也齊侯衛侯不

敬叔向曰二君必不免會朝禮之經也禮政之輿也政身之守也怠禮失政失政不立是以亂也 二十二年

秋欒盈自楚適齊晏平仲曰商任之會受天於晉今納欒氏將安用之小所以事大信也失信不立君其圖之弗聽告陳文子曰君人執信臣人執共忠信篤敬上下同之天之道也君自弃也弗能久矣冬會于沙隨復錮欒氏也欒盈猶在齊晏子曰禍將作矣齊將伐晉不可以不懼 二十三年晉侯將嫁女于吳齊侯使析歸父

勝之以藩載藥盈及其士納諸曲沃四月藥盈帥曲沃

之甲因魏獻子以晝入絳范鞅用劍以帥卒藥氏退盈

奔曲沃晉人圍之秋齊侯伐衛先驅穀榮御王孫揮召

揚爲右申驅次前軍成秩御莒恒申鮮虞之傅摯爲右曹

開御戎晏父戎爲右公御右也貳廣上之登御邢公盧蒲癸

爲右公副啓左翼牢成御襄罷師狼蘧疏爲右肱右翼曰肱

商子車御侯朝桓跳爲右大殿後軍商子游御夏之御寇

崔如爲右燭庸之越駟乘自衛將遂伐晉晏平仲曰君

恃勇力以伐盟主若不濟國之福也不德而有功憂必
及君崔杼諫曰不可臣聞之小國聞大國之敗而毀焉

必受其咎弗聽陳文子見崔武子曰將如君何武子曰
吾言於君君弗聽也以爲盟主而利其難羣臣若急君

於何有文子退告其人曰崔子將死乎謂君甚而又過
之不得其死過君以義猶自抑也況以惡乎齊侯遂伐

晉取朝歌爲二隊入孟門登大行張武軍

謂築壘壁

於熒庭

戍郛邵晉封少水

封晉尸於少水爲京觀

以報平陰之役乃還遂

襲莒門于且于傷股而退明日將復戰杞殖華還宿於

莒郊明日先遇莒子於蒲侯氏莒子重賂之使無死華

周對曰貪貨弃命亦君所惡也昏而受命日未中而弃

之何以事君莒子親鼓之從而伐之獲杞梁莒人行成

勝大國而畏齊侯歸遇杞梁之妻於郊使弔之辭曰殖之有

罪何辱命焉若免於罪猶有先人之敝廬在下妾不得

與郊弔

婦人無外事故

齊侯弔諸其室

二十四年齊侯既伐

晉而懼將欲見楚子楚子使薳啓彊如齊聘且請期齊

社蒐軍實使客觀之陳文子曰齊將有寇吾聞之兵不

戢必取其族秋齊侯聞有晉師使陳無宇從遠啓疆如

楚辭且乞師會于夷儀將以伐齊水不克冬楚子伐鄭

以救齊諸侯還救鄭晉侯使張骼輔櫟致楚師求御于

鄭鄭人卜宛射犬吉子大叔戒之曰大國之人不可與

也對曰無有衆寡其上一也大叔曰不然部婁無松柏

二子在幄坐射犬于外旣食而後食之使御廣車而行

已皆乘車將及楚師而後從之乘皆踞轉衣裝而鼓琴

近不告而馳之皆取冑於橐而冑入壘皆下搏人以投
收禽挾囚弗待而出皆超乘抽弓而射旣免復踞轉而
鼓琴曰公孫同乘兄弟也胡再不謀對曰曩者志入而
已今則怯也皆笑曰公孫之亟也 二十五年崔杼帥
師伐我北鄙公患之孟公綽曰崔子將有大志不在病
我必速歸何患焉其來也不寇使民不嚴異於他日齊
師徒歸齊棠公之妻東郭偃之姊也東郭偃臣崔武子
棠公死偃御崔以弔焉見棠姜而美之使偃取之偃曰

男女辨姓今君出自丁臣出自桓不可武子筮之遇困

䷛ 坎下 之大過 ䷛ 巽下 史皆曰吉示陳文子文子曰夫

從風 坎為中男故曰夫 風墮妻不可娶也且其繇曰困

于石據于蒺藜入于其宮不見其妻凶困于石往不濟

也據于蒺藜所恃傷也入于其宮不見其妻凶無所歸

也崔子曰嫠也何害先夫當之矣遂取之莊公通焉驪

如崔氏以崔子之冠賜人崔子因是又以其閒伐晉也

曰晉必將報欲弑公以說于晉夏五月莒子朝于齊甲

戎饗諸北郭崔子稱疾不視事乙亥公問崔子遂從姜

氏姜入于室與崔子自側戶出公拊楹而歌侍人賈舉

止衆從者而入閉門甲興公登臺而請弗許請盟弗許

請自刃於廟弗許皆曰君之臣杼疾病不能聽命陪臣

于極有淫者不知二命公踰牆又射之中股返隊遂弑

之賈舉

非上侍人賈舉

州綽邴師公孫敖封具鐸父襄伊偃堙

皆死祝佗父祭於高唐至復命不說弁而死於崔氏申

蒯侍魚者

監取魚者

退謂其宰曰爾以帑免我將死其宰曰

免是反子之義也與之皆死崔氏殺馮蔑于平陰晏子

立於崔氏之門外其人曰死乎曰獨吾君也乎哉吾死

也曰行乎曰吾罪也乎哉吾亡也曰歸乎曰君死安歸

君民者豈以陵民社稷是主臣君者豈爲其口實社稷

是養故君爲社稷死則死之爲社稷亡則亡之若爲己

死而爲己亡非其私暱誰敢任之且人有君而弑之吾

焉得死之而焉得亡之將庸何歸

用死亡之義無所歸

門啓而入

枕尸股而哭興三踊而出人謂崔子必殺之崔子曰民

之望也舍之得民盧蒲癸奔晉王何奔莒叔孫宣伯如僑

之在齊也納其女於靈公生景公丁丑崔杼立而相之

慶封爲左相盟國人於大宮曰所不與崔慶者晏子仰

天歎曰嬰所不唯忠於君利社稷者是與有如上帝乃

敵大史書曰崔杼弑其君崔子殺之其弟嗣書而死者

二人其弟又書乃舍之南史氏聞大史盡死執簡而往

聞既書矣乃還崔氏側莊公于北郭丁亥葬諸士孫之

里四嬰不蹕下車七乘不以兵甲

下車送葬車齊依上公禮以九乘晉

侯會于夷儀伐齊以報朝歌之役齊人以莊公說使隰

鉏請成慶封如師男女以班賂晉侯以宗器樂器自六

正三軍五吏文三十帥武臣軍三軍之大夫百官之正

帥

臣

三十帥

武臣軍之屬

長師旅及處守者皆有賂晉侯許之二十七年齊慶

封來聘其車美孟孫謂叔孫曰慶季之車不亦美乎叔

孫曰豹聞之服美不稱必以惡終美車何為叔孫與慶

封食不敬為賦相鼠亦不知也齊崔杼生成及彊而寡

娶東郭姜生明東郭以孤入曰棠無咎與東郭偃相崔

氏崔成有疾廢之而立明成請老于崔崔子許之偃與
無咎弗與曰崔宗邑也必在宗主成與彊怒將殺之告
慶封曰夫子之身亦子所知也唯無咎與偃是從大恐
害夫子敢以告慶封告盧蒲癸癸曰彼實家亂子何病
焉崔之薄慶之厚也他日又告慶封曰苟利夫子必去
之難吾助女九月崔成崔彊殺東郭偃棠無咎於崔子
之朝崔子怒而出遂見慶封慶封曰崔慶一也是何敢
然請爲子討之使盧蒲癸帥甲以攻崔氏殺成與彊而

盡俘其家其妻縊嬖復命於崔子且御而歸之至則無

歸矣乃縊辛巳崔明來奔慶封當國 二十八年齊慶

封好田而嗜酒與慶舍政子封則以其內寶寶物遷于盧

蒲嬖氏易內而飲酒數日國遷朝焉使諸亡人得賊者

以告而反之故反盧蒲癸癸臣子之也舍有寵妻之慶舍

之士謂盧蒲癸曰男女辨姓子不辟宗何也曰宗不余

辟余獨焉辟之賦詩斷章余取所求焉惡識宗癸言王

何而反之二人皆嬖使執寢戈而先後之公膳日雙雞

卿大夫之食

饗人竊更之以驚御者知之則去其肉

去起而呂反

以其洎

肉饋

此癸何之謀使大夫怒慶氏

子尾子雅怒慶封告盧蒲

嫫盧蒲嫫曰譬之如禽獸吾寢處之矣盧蒲癸王何卜

攻慶氏示子之兆曰或卜攻讎

敢獻其兆子之曰克見

血冬十月慶封田于萊慶嗣

封族間

之曰禍將作矣謂子

家速歸禍作必於嘗歸猶可及也子家弗聽亦無悛志

盧蒲姜謂癸曰不告我必不捷矣癸告之姜曰夫子愎

莫之止將不出我請止之癸曰諾十一月乙亥嘗於大

公之廟慶舍泣事盧蒲姜告之且止之曰誰敢者遂如

公麻嬰爲尸慶集爲上獻盧蒲癸王何執寢戈慶氏以

其甲環公宮

廟在宮內

陳氏鮑氏之圉人爲優慶氏之馬善

驚士皆釋甲束馬而飲酒且觀優至於魚里樂高陳鮑

之徒介慶氏之甲子尾抽桷擊扉三盧蒲癸自後刺子

之王何以戈擊之解其左肩猶援廟桷動於薨以俎壺

投殺人而後死公懼鮑國曰羣臣爲君故也陳須無以

公歸慶封入伐內宮弗克反陳于獄請戰弗許遂來奔

獻車於季武子美澤可以鑑展莊叔見之曰車甚澤人必瘁宜其亡也叔孫穆子食慶封慶封祀祭穆子使工爲之誦茅鷁亦不知旣而齊人來讓奔吳吳句餘與之朱方聚其族焉而居之富於其舊子服惠伯謂叔孫曰天殆富淫人慶封又富矣穆子曰善人富謂之賞淫人富謂之殃天其殃之也其將聚而殲旃崔氏之亂喪羣公子故鉏在魯叔孫還在燕賈在句瀆之丘及慶氏亡皆召之具其器用而反其邑焉與晏子邶殿其鄙六十

弗受子尾曰富人之所欲也何獨弗欲對曰慶氏之邑足欲故亡吾邑不足欲也益之以邶殿乃足欲足欲亡無日矣在外不得宰吾一邑不受邶殿非惡富也恐失富也且夫富猶布帛之有幅焉為之制度使無遷也夫民生厚而用利於是乎正德以幅之使無黜嫚謂之幅利利過則為敗吾不敢貪多所謂幅也與北郭佐邑六十受之與子雅邑辭多受少與子尾邑受而稍致之公以為忠故有寵釋盧蒲婁于北竟求崔杼之尸將戮之

不得叔孫穆子曰必得之武王有亂臣十人崔杼其有
乎不十人不足以葬既崔氏之臣曰與我其拱壁吾獻
其柩於是得之十二月齊人遷莊公殯于大寢以其棺
尸崔杼于市 二十九年二月齊人葬莊公于北郭

昭三年齊侯田于莒盧蒲嬰見泣且請曰余髮如此種
種余奚能為公曰諾吾告二子子尾欲復之子雅不可
曰彼其髮短而心甚長其或寢處我矣九月子雅放盧
蒲嬰于北燕 四年秋楚子以諸侯伐吳使屈申圍朱

方克之執齊慶封而盡滅其族將戮慶封椒舉曰臣聞
無瑕者可以戮人慶封唯逆命是以此其肯從於戮
乎王弗聽負之斧鉞以徇於諸侯使言曰無或如齊慶
封弑其君弱其孤以盟其大夫慶封曰無或如楚共王
之庶子圍弑其君兄之子麇而代之盟諸侯王使速
殺之

衛石共子卒

衛石共子卒悼子不哀孔成子曰是謂變其本必不有

其宗 二十八年衛人討甯氏之黨石惡出奔晉衛人立其從子圉以守石氏之祀禮也

二十年

陳殺二慶

蔡公子變欲以蔡之晉蔡人殺之陳慶虎慶寅畏公子黃之偪愬諸楚曰與司馬同謀楚人以爲討公子黃出奔楚初蔡文侯欲事晉曰先君與於踐土之盟晉不可弃且兄弟也畏楚不能行而卒楚人使蔡無常公子變

言不與民同欲也公子黃將出奔呼

故好

於國曰慶氏無

道求專陳國暴蔑其君而去其親五年不滅是無天也

二十三年陳侯如楚公子黃慙二慶于楚楚人召之

使慶樂往殺之慶氏以陳叛屈建從陳侯圍陳陳人城

役人相命各殺其長遂殺慶虎慶寅楚人納公子黃君

子謂慶氏不義不可肆也故書曰惟命不于常二十

四年陳人復討慶氏之黨鍼且咎出奔楚

季武子如宋聘

季武子如宋聘褚師段逆之以受享賦常棣之七章以

卒言二國好合宜其室家其相親如兄弟宋人重賄之歸復命公享之賦

魚麗之卒章

物其有矣維其時矣聘宋以時公賦南山有臺

樂只君子邦家之光

武子去所曰臣不堪也

二十一年

魯季孫來外盜

邾庶其以漆間丘來奔季武子以公姑姊妻之皆有賜於其從者於是魯多盜季孫謂臧武仲曰子盍詰盜武

仲曰不可詰也紇又不能季孫曰我有四封而詰其盜

何故不可子為司寇將盜是務去若之何不能武仲曰

子召外盜而大禮焉何以止吾盜子為正卿而來外盜

使紇去之將何以能庶其竊邑於邾以來子以姬氏妻

之而與之邑其從者皆有賜焉若大盜禮焉以君之姑

姊與其大邑其次阜牧輿馬其小者衣裳劍帶是賞盜

也賞而去之其或難焉紇也聞之在上位者洒濯其心

壹以待人軌度

待

洛其信可明徵也而後可以治人夫上

之所爲民之所歸也上所不爲而民或爲之是以加刑
罰焉而莫敢不懲若上之所爲而民亦爲之乃其所也
又可禁乎夏書曰念茲在茲釋茲在茲名言茲在茲允
出茲在茲惟帝念功將謂由己壹也信由己壹而後功
可念也

楚殺子南

楚子庚卒楚子使薳子馮爲令尹訪於申叔豫曰國多
寵而王弱國不可爲也遂以疾辭方暑闕地下冰而牀

焉重繭

錦衣

衣裘鮮食而寢楚子使醫視之復曰瘠則甚

矣而血氣未動乃使子南

追舒

爲令尹

二十二年楚觀

起有寵於令尹子南未益祿而有馬數十乘楚人患之

王將討焉子南之子弃疾爲王御士王每見之必泣弃

疾曰君三泣臣矣敢問誰之罪也王曰令尹之不能爾

所知也國將討焉爾其居乎對曰父戮子居君焉用之

洩命重刑臣亦不爲王遂殺子南於朝轅觀起於四境

子南之臣謂弃疾請徙子尸於朝曰君臣有禮唯二三

子不欲三曰弃疾請尸王許之既葬其徒曰行乎曰吾

犯命

與殺吾父行將焉入曰然則臣王乎曰弃疾事讎吾弗

忍也遂縊而死復使蘧子馮爲令尹公子黈爲司馬屈

建爲莫敖有寵於蘧子者八子皆無祿而多馬他日朝

與申叔豫言弗應而退從之入于人中又從之遂歸退

朝見之曰子三困我於朝吾懼不敢不見吾過子姑告

我對曰昔觀起有寵於子南子南得罪觀起車裂何故

不懼自御而歸不能當道至謂八人者曰吾見申叔夫

子所謂生死而肉骨也知我者如夫子則可不然請止
辭八人者而後王安之

羊舌氏之族及於難

晉欒盈出奔楚范宣子殺羊舌虎囚叔向人謂叔向曰
子離於罪其爲不知乎叔向曰與其死亡若何詩曰優
哉游哉聊以卒歲知也樂王鮒見叔向曰吾爲子請叔
向弗應出不拜其人皆咎叔向叔向曰必祁大夫室老
聞之曰樂王鮒言於君無不行求赦吾子吾子不許祁

大夫所不能也而曰必由之何也叔向曰樂王鮒從君

者也何能行祁大夫外舉不弃讎內舉不失親其獨遺

我乎詩曰有覺德行四國順之夫子覺者也

覺較然正直

晉

侯問叔向之罪於樂王鮒對曰不弃其親其有焉於是

祁奚老矣聞之乘駟

實入

而見宣子曰詩曰惠我無疆子

孫保之書曰聖有謇勲明徵定保夫謀而鮮過惠訓不

倦者叔向有焉社稷之固也猶將十世宥之以勸能者

今壹不免其身以弃社稷不亦惑乎鮒殛而禹興伊尹

放大甲而相之卒無怨色管蔡為戮周公右王若之何其以虎也弃社稷子爲善誰敢不勉多殺何爲宣子說與之乘以言諸公而免之不見叔向而歸叔向亦不告免焉而朝初叔向之母妬叔虎之母美而不使其子皆諫其母其母曰深山大澤實生龍蛇彼美余懼其生龍蛇以禍女女敝族也國多大寵不仁人間之不亦難乎余何愛焉使往視寢生叔虎美而有勇力藥懷子嬖之故羊舌氏之族及於難

二十二年

穆叔能用教

臧武仲如晉雨過御名邑叔御叔在其邑將飲酒曰焉用

聖人

武仲多知
時曰聖人

我將飲酒而已雨行何以聖爲穆叔聞

之曰不可使也而傲使人國之蠹也令倍其賦

晉召鄭朝

晉人徵朝于鄭鄭人使少正公孫僑對曰在晉先君悼
公九年我寡君於是即位即位八月而我先大夫子馬

從寡君以朝于執事執事不禮於寡君寡君懼因是行也我二年六月朝于楚晉是以有戲之役楚人猶競而申禮於敝邑敝邑欲從執事而懼爲大尤曰晉其謂我不共有禮是以不敢攜貳於楚我四年三月先大夫子蟜又從寡君以觀鬻於楚晉於是乎有蕭魚之役謂我敝邑邇在晉國譬諸草木吾臭味也而何敢差池楚亦不競寡君盡其土實重之以宗器以受齊盟

齊也

遂帥

羣臣隨于執事以會歲終貳於楚者子侯石孟歸而討

之湟梁之明年子矯老矣公孫夏從寡君以朝于君見
於嘗酎與執膳焉間二年間君將靖東夏二十年四月
又朝以聽事期不朝之間無歲不聘無役不從以大國
政令之無常國家罷病不虞荐至無日不惕豈敢忘職
大國若安定之其朝夕在庭何辱命焉若不恤其患而
以爲口實其無乃不堪任命而翦爲仇讎敝邑是懼其
敢忘君命委諸執事執事實重圖之

鄭子張善戒

鄭公孫黑肱有疾歸邑于公召室老宗人立段而使黜

官不多受職薄祭祭以特羊殷以少牢足以共祀盡歸其餘

邑曰吾聞之生於亂世貴而能貧民無求焉可以後亡

敬共事君與二三子生在敬戒不在富也已己伯張卒

君子曰善戒詩曰慎爾侯度用戒不虞鄭子張其有焉

鄭游販奪逆妻者

鄭游販將如晉未出竟遭逆妻者奪之以館于邑丁巳
其夫攻子明殺之以其妻行子展廢良而立大叔曰國

卿君之貳也民之主也不可以苟請舍子明之類求亡妻者使復其所使游氏勿怨曰無昭惡也

二十三年

杞孝公卒晉平公不徹樂

杞孝公卒晉悼夫人喪之平公不徹樂非禮也禮爲鄰國闕

臧紇作不順去魯

季武子無適子公彌長而愛悼子欲立之訪於臧紇臧

紇曰飲我酒吾爲子立之季氏飲大夫酒臧紇爲客既獻召悼子降逆之大夫皆起及旅而召公鉏使與之齒季孫失色季氏以公鉏爲馬正愠而不出閔子馬見之曰子無然禍福無門唯人所召爲人子者患不孝不患無所敬共父命何常之有若能孝敬富倍季氏可也姦回不軌禍倍下民可也公鉏然之敬共朝夕恪居官次季孫喜使飲已酒而以具往盡舍旃故公鉏氏富又出爲公左宰孟孫惡臧孫季孫愛之孟氏之御騶豐點好

羯也曰從余言必爲孟孫羯從之孟莊子疾豐點謂公

鉏苟立羯請讎臧氏公鉏謂季孫曰孺子秩固其所也

若羯立則季氏信有力於臧氏矣弗應己卯孟孫卒公

鉏奉羯立于戶側季孫至入哭而出曰秩焉在公鉏曰

羯在此矣季孫曰孺子長公鉏曰何長之有唯其才也

且夫子之命也遂立羯秩奔邾臧孫入哭甚哀多涕出

其御曰孟孫之惡子也而哀如是季孫若死其若之何

臧孫曰季孫之愛我疾疢也孟孫之惡我藥石也美疢

不如惡石夫石猶生我疾之美其毒滋多孟孫死吾亡

無日矣孟氏閉門告於季孫曰臧氏將爲亂不使我葬

季孫不信臧孫聞之戒冬十月孟氏將辟藉除於臧氏

臧孫使正夫助之除於東門甲從己而視之

畏孟氏

孟氏

又告季孫季孫怒命攻臧氏臧紇斬鹿門之關以出奔

邾初臧宣叔娶于鑄生賈及爲而死繼室以其姪穆姜

之姨子也生紇長於公宮姜氏愛之故立之臧賈臧爲

出在鑄臧武仲自邾使告臧賈且致大蔡焉曰紇不佞

失守宗祧敢告不弔紇之罪不及不祀子以大蔡納請

其可賈使爲以納請遂自爲也臧孫如防使來告曰紇

非能害也知不足也非敢私請苟守先祀無廢二勲

文仲

宣叔敢不辟邑乃立臧爲臧紇致防而奔齊其人曰其盟

我乎臧孫曰無辭將盟臧氏季孫召外史掌惡臣而問

盟首載書章首焉對曰盟東門氏也曰毋或如東門遂不聽

公命殺適立庶盟叔孫氏也曰毋或如叔孫僑如欲廢

國常蕩覆公室季孫曰臧孫之罪皆不及此孟椒曰盍

以其犯門斬關季孫用之乃盟臧氏曰無或如臧孫紇

干國之紀犯門斬關臧孫聞之曰國有人焉誰居

音基與也

其孟椒乎

子服惠伯

齊侯將爲臧紇田臧孫聞之見齊侯與

之言伐晉對曰多則多矣抑君似鼠夫鼠晝伏夜動不

穴於寢廟畏人故也今君聞晉之亂而後作焉寧將事

之非鼠而何乃弗與田仲尼曰知之難也有臧武仲之

知而不容於魯國抑有由也作不順而施不怨也夏書

曰念茲在茲順事恕施也

二十四年

穆叔對死而不朽

穆叔如晉范宣子逆之問焉曰古人有言曰死而不朽何謂也穆叔未對宣子曰昔句之祖自虞以上爲陶唐氏在夏爲御龍氏在商爲豕韋氏在周爲唐杜氏晉主夏盟爲范氏其是之謂乎穆叔曰以豹所聞此之謂世祿非不朽也魯有先大夫曰臧文仲旣沒其言立其是之謂乎豹聞之大上有立德其次有立功其次有立言

雖久不廢此之謂不朽若夫保姓受氏以守宗祊世不絕祀無國無之祿之大者不可謂不朽

范宣子重幣鄭伯朝晉且請伐陳

范宣子爲政諸侯之幣重鄭人病之鄭伯如晉子產寓書於子西以告宣子曰子爲晉國四鄰諸侯不聞令德而聞重幣僞也惑之僞聞君子長國家者非無賄之患而無令名之難夫諸侯之賄聚於公室則諸侯貳若吾子賴之則晉國貳諸侯貳則晉國壞晉國貳則子之家

壞何沒沒也將焉用賄夫令名德之興也德國家之基
也有基無壞無亦是務乎有德則樂樂則能久詩云樂
只君子邦家之基有令德也夫上帝臨女無貳爾心有
令名也夫恕思以明德則令名載而行之是以遠至邇
安毋寧使人謂子子實生我而謂子浚我以生乎象有
齒以焚其身賄也宣子說乃輕幣是行也鄭伯朝晉爲
重幣故且請伐陳也鄭伯稽首宣子辭子西相曰以陳
國之介恃大國而陵虐於敝邑寡君是以請罪焉敢不

稽首 二十五年初陳侯會楚子伐鄭前當陳隧者井

堙木刊鄭人怨之六月鄭子展子產帥車七百乘伐陳

入之子展命師無入公宮與子產親御諸門陳侯使司

馬桓子賂以宗器陳侯免擁社使其衆男女別而纍以

待於朝子展執紼而見再拜稽首承飲而進獻子美入

數俘而出祝祓社司徒致民司馬致節兵德司空致地乃

還鄭子產獻捷于晉戎服將事晉人問陳之罪對曰昔

虞關父爲周陶正以服事我先王我先王賴其利器用

也與其神明之後也庸以元女大姬配胡公而封諸陳
以備三恪則我周之自出至于今是賴桓公之亂蔡人
欲立其出我先君莊公奉五父而立之蔡人殺之我又
與蔡人奉戴厲公至于莊宣皆我之自立夏氏之亂成
公播蕩又我之自入君所知也今陳忘周之大德蔑我
大惠弃我姻親介恃楚衆以馮陵我敝邑不可億億
逞我是以有往年之告未獲成命則有我東門之役當
陳隧者井堙木刊敝邑大懼不競而恥大姬天誘其衷

啓敝邑心陳知其罪授手于我用敢獻功晉人曰何故

侵小對曰先王之命唯罪所在各致其辟且昔天子之

地一圻

千里列國一同

百自是以衰今大國多數圻矣若

無侵小何以至焉晉人曰何故戎服對曰我先君武莊

爲平桓卿士城濮之役文公布命曰各復舊職命我文

公戎服輔王以授楚捷不敢廢王命故也士莊伯不能

詰復於趙文子文子曰其辭順犯順不祥乃受之冬子

展相鄭伯如晉拜陳之功子西復伐陳陳及鄭平仲尼

曰志有之言以足志文以足言不言誰知其志言之無文行而不遠晉爲伯鄭入陳非文辭不爲功慎辭哉

二十六年鄭伯賞入陳之功三月甲寅朔享子展賜之

先路三命之服先八色

三十井

賜子產次路再命之服先

六色子產辭色曰自上以下降殺以兩禮也臣之位在此四且子展之功也臣不敢及賞禮請辭色公固予之乃受三色公孫揮曰子產其將知政矣讓不失禮

楚滅舒鳩

楚子爲舟師以伐吳不爲軍政

賞罰之差

無功而還吳人爲

楚舟師之役故召舒鳩人舒鳩人叛楚楚子師于荒浦
使沈尹壽與師祁犁讓之舒鳩人敬逆二子而告無之
且請受盟二子復命王欲伐之蘧子曰不可彼告不叛
而又伐之伐無罪也姑歸息民以待其卒卒而不貳吾
又何求若猶叛我無辭有庸乃還 二十五年楚蘧子

馮卒屈建爲令尹舒鳩人卒叛令尹子木伐之及離城
吳人救之子木遽以右師先子彊息桓子捷子駢子孟

帥左師以退

五人不與吳師遇而退

吳人居其間七日子彊曰

久將墊隘隘乃禽也不如速戰請以其私卒誘之簡師

陳以待我我克則進奔則亦視之

視勢而求

乃可以免不然

必爲吳禽從之五人以其私卒先擊吳師吳師奔登山

以望見楚師不繼復逐之簡師會之吳師大敗遂圍舒

鳩八月滅之十二月吳子諸樊伐楚以報舟師之役門

于巢巢牛臣曰吳王勇而輕若啓之將親門我獲射之

必殪是君也死疆其少安從之吳子門焉牛臣射之卒

楚子以滅舒鳩賞子木辭曰先大夫薦子之功也

前請退師

以須其叛以與薦掩

豎牛亂叔孫氏

齊人城郊

王城

穆叔如周聘且賀城王嘉其有禮也賜之

大路

昭四年初穆子去叔孫氏及庚宗

辟僑如

遇婦人

使私爲食而宿焉適齊娶于國氏生孟丙仲壬夢天壓

已弗勝顧而見人黑而上僂

肩偃

深目而獬喙號之曰牛

助余乃勝之旦而皆召其徒無之且曰志之魯人召之

而歸既立所宿庚宗之婦人獻以雉問其姓曰余子長
矣召而見之則所夢也未問其名號之曰牛曰唯遂使
爲豎有寵長使爲政田於丘薊遂遇疾焉豎牛欲亂其
室而有之強與孟盟不可叔孫爲孟鍾曰爾未際饗大
夫以落之

以豨猪血饗鍾謂之落

既具使豎牛請日入弗謁出命

之日及賓至聞鍾聲牛曰孟有北婦人之客怒將往牛
止之賓出使拘而殺諸外

殺孟

牛又強與仲盟不可仲

與公御菜書觀於公公與之環使牛入示之入不示出

命佩之牛謂叔孫見仲而何叔孫曰何爲曰不見旣自
見矣公與之環而佩之矣遂逐之奔齊疾急命召仲牛
許而不召杜洩見告之飢渴授之戈對曰求之而至又
何去焉豎牛曰夫子疾病不欲見人使寘饋于个廂而
退牛弗進則置虛命徹十二月癸丑叔孫不食乙卯卒
牛立昭子而相之公使杜洩葬叔孫豎牛賂叔仲昭子
與南遺使惡杜洩於季孫而去之杜洩將以路葬且盡
卿禮南遺謂季孫曰叔孫未乘路葬焉用之且冢卿無

路介卿以葬不亦左乎季孫曰然使杜洩舍路不可曰

夫子受命於朝而聘於王王思舊勲而賜之路復命而

致之君君不敢逆王命而復賜之使三官書之吾子爲

司徒實書名夫子爲司馬與工正書服孟孫爲司空以

書勲今死而弗以是弃君命也書在公府而弗以是廢

三官也若命服生弗敢服死又不以將焉用之乃使以

葬季孫謀去中軍豎牛曰夫子固欲去之

事見作三軍下

昭

五年叔仲子謂季孫曰帶受命於子叔孫曰葬鮮

非命曰卜

者自西門季孫命杜洩洩曰卿喪自朝魯禮也吾子爲國政未改禮而又遷之羣臣懼死不敢自也旣葬而行仲至自齊季孫欲立之南遺曰叔孫氏厚則季氏薄彼實家亂子勿與知不亦可乎南遺使國人助豎牛以攻諸大庫之庭司宮射之中目而死昭子即位朝其家衆曰豎牛禍叔孫氏使亂大從殺適立庶將以赦罪罪莫大焉必速殺之牛懼奔齊孟仲之子殺諸塞關之外投其首於寧風之棘上仲尼曰叔孫昭子之不勞不可能

也周任有言曰爲政者不賞私勞不罰私怨詩云有覺

德行四國順之初穆子之生也莊叔以周易筮之遇明

夷

離下坤上

之謙

艮下坤上

以示卜

楚丘曰是將行而

歸爲子祀以讒人入其名曰牛卒以餒死明夷日也日

之數十

甲癸

故有十時亦當十位自王已下其二爲公其

三爲卿

日中當王食時當公平旦爲卿雞鳴爲士夜半爲皂人定爲輿黃昏爲隸日入爲僚哺時爲僕

日暎爲臺

日上其中食日爲二旦日爲三明夷之謙明而未

融其當旦乎

離在坤下日在地中之象又變爲謙謙道卑退故明而未融

故曰爲子

祀卜豹爲卿

日之謙當鳥故曰明夷于飛

離爲日爲鳥
離變爲謙日

光不足明而未融故曰垂其翼象日之動故曰君子于

行初九有應君子象也在明傷
之世居下位將辟難而行

當三在旦故曰三日不

食離火也艮山也離爲火火焚山山敗

離艮
合體

於人爲言

艮爲敗言爲讒

爲離所
焚故敗

故曰有攸往主人有言言必讒

也純離爲牛

畜牡
牛吉

世亂讒勝勝將適離故曰其名曰牛

離焚山則離勝喻世亂則讒
勝山焚則離獨存故知名牛

謙不足飛不翔垂不峻翼

不廣故曰其爲子後乎吾子亞卿也抑少不終

旦正卿
莊叔世

爲亞卿而已位不足
盡卦體蓋引而致之

子產始知然明

晉侯嬖程鄭使佐下軍鄭公孫揮如晉聘程鄭問焉曰
敢問降階何由子羽不能對歸以語然明然明曰是將
死矣不然將亡貴而知懼懼而思降乃得其階下人而
已又何問焉且夫既登而求降階者知人也不在程鄭
其有亡讎乎不然其有惑疾將死而憂也 二十五年
晉程鄭卒子產始知然明問爲政焉對曰視民如子見

不仁者誅之如鷹鷂之逐鳥雀也子產喜以語子大叔
曰他日吾見蔑之面而已今吾見其心矣子大叔問政
於子產子產曰政如農功日夜思之思其始而成其終
朝夕而行之行無越思如農之有畔其過鮮矣

二十五年

宋向戌弭諸侯之兵

晉趙文子爲政令薄諸侯之幣而重其禮穆叔見之謂
穆叔曰自今以往兵其少弭矣齊崔慶新得政將求善

於諸侯武也知楚令尹若敬行其禮道之以文辭以靖

諸侯兵可以弭

二十六年許靈公如楚請伐鄭

十六年晉

伐許他國皆大夫
鄭伯自行故惠之

曰師不興孤不歸矣八月卒于楚楚

子曰不伐鄭何以求諸侯冬楚子伐鄭鄭人禦之子產

曰晉楚將平諸侯將和楚王是故昧於一來不如使逞

而歸乃易成也夫小人之性讐於勇而嗇於禍以足其

性而求名焉者非國之利也若何從之子展說不禦寇

十二月入南里墮其城門于師之梁涉汜而歸而後葬

許靈公 二十七年宋向戌善於趙文子又善於令尹

子木欲弭諸侯之兵以爲名如晉告趙孟趙孟謀於諸大夫韓宣子曰兵民之殘也財用之蠹小國之大菑也將或弭之雖曰不可必將許之弗許楚將許之以召諸侯則我失爲盟主矣晉人許之如楚楚亦許之如齊齊人許之告於秦秦亦許之皆告於小國爲會於宋子木謂向戌請晉楚之從交相見也向戌復於趙孟趙孟曰晉楚齊秦匹也晉之不能於齊猶楚之不能於秦也楚

君若能使秦君辱於敝邑寡君敢不固請於齊向戌復言於子木子木使馮謁諸王王曰釋齊秦他國請相見也以藩爲軍晉楚各處其偏伯夙謂趙孟曰楚氛甚惡懼難趙孟曰吾左還入於宋若我何盟於宋西門之外楚人衷甲伯州犂曰合諸侯之師以爲不信無乃不可乎夫諸侯望信於楚是以來服若不信是弃其信以服諸侯也固請釋甲子木曰晉楚無信久矣事利而已苟得志焉焉用有信大宰退告人曰令尹將死矣不及三

年求逞志而棄信志將逞乎志以發言言以出信信以

立志參以定之信亡何以及三趙孟患楚衷甲以告叔

向叔向曰何害也匹夫一爲不信猶不可單斃其死若

合諸侯之卿以爲不信必不捷矣食言者不病非子之

患也夫以信召人而以僭濟之必莫之與也安能害我

且吾因宋以守病

爲楚所病則入宋守

則夫能致死與宋致死則

雖倍楚可也子何懼焉又不及是曰弭兵以召諸侯而

稱兵以害我吾庸多矣非所患也季武子使謂叔孫以

公命曰視邾滕既而齊人請邾宋人請滕皆不與盟叔孫曰邾滕人之私也我列國也何故視之宋衛吾匹也乃盟故不書族言違命也晉楚爭先晉人曰晉固爲諸侯盟主未有先晉者也楚人曰子言晉楚匹也若晉常先是楚弱也且晉楚狎主諸侯之盟也久矣豈專在晉叔向謂趙孟曰諸侯歸晉之德只非歸其尸盟也子務德無爭先且諸侯盟小國固必有尸盟者楚爲晉細不亦可乎乃先楚人書先晉晉有信也宋公兼享晉楚之

大夫趙孟爲客子木與之言弗能對使叔向侍言焉子
木亦不能對也子木問於趙孟曰范武子之德何如對
曰夫子之家事治言於晉國無隱情其祝史陳信於鬼
神無愧辭子木歸以語王王曰尚矣哉能歆神人宜其
光輔五君以爲盟主也子木又語王曰宜晉之伯也有
叔向以佐其卿楚無以當之不可與爭晉荀盈遂如楚
涖盟鄭伯享趙孟于垂隴子展伯有子西子產子大叔
二子石從趙孟曰七子從君以寵武也請皆賦以卒君

賦武亦以觀七子之志子展賦草蟲既見君子趙孟曰

善哉民之主也抑武也不足以當之伯有賦鶉之賁賁

其君淫亂鶉之不若趙孟曰牀第之言不踰閫非使人之所得聞

也子西賦黍苗之四章比趙孟趙孟曰寡君在武何能

焉子產賦隰桑思見君子盡心以事之趙孟曰武請受其卒章子

大叔賦野有蔓草邂逅相遇適我願兮趙孟曰吾子之惠也印段

賦蟋蟀好樂無荒趙孟曰善哉保家之主也吾有望矣公孫

段賦桑扈君子有禮文而受天之祐趙孟曰匪交匪敖福將焉往若

保是言也欲辭福祿得乎卒享文子告叔向曰伯有將
爲戮矣詩以言志志誣其上而公怨之以爲賓榮其能
久乎幸而後亡叔向曰然已侈所謂不及五稔者夫子
之謂矣爲三十年鄭殺良霄傳文子曰其餘皆數世之主也子展

其後亡者也在上不忘降印氏其次也樂而不荒樂以
安民不淫以使之後亡不亦可乎宋左師請賞曰請免
死之邑公與之邑六十以示子罕子罕曰凡諸侯小國
晉楚所以兵威之畏而後上下慈和慈和而後能安靖

其國家以事大國所以存也無威則驕驕則亂生亂生必滅所以亡也天生五材民並用之廢一不可誰能去兵兵之設久矣所以威不軌而昭文德也聖人以興亂人以廢廢興存亡昏明之術皆兵之由也而子求去之不亦誣乎以誣道蔽諸侯罪莫大焉縱無大討而又求賞無厭之甚也削而投之左師辭邑向氏欲攻司城左師曰我將亡夫子存我德莫大焉又可攻乎君子曰彼己之子邦之司直樂喜之謂乎何以恤我我其收之向

戎之謂乎楚遠罷如晉蒞盟晉侯享之將出賦既醉叔
向曰遠氏之有後於楚國也宜哉承君命不忘敏子蕩
將知政矣敏以事君必能養民政其焉往 二十八年
夏齊侯陳侯蔡侯北燕伯杞伯胡子沈子白狄朝于晉
宋之盟故也齊侯將行慶封曰我不與盟何爲於晉陳
文子曰先事後賄禮也小事大未獲事焉從之如志禮
也未從其政當從大雖不與盟敢叛晉乎孟孝伯如晉
國請事以順其志告將爲宋之盟故如楚也鄭伯使游吉如楚及漢楚人

還之曰宋之盟君實親辱今吾子來寡君謂吾子姑還
吾將使駟奔問諸晉而以告子大叔曰宋之盟君命將
利小國而亦使安定其社稷鎮撫其民人以禮承天之
休此君之憲令而小國之望也寡君是故使吉奉其皮
幣以歲之不易聘於下執事今執事有命曰女何與政
令之有必使而君弃而封守跋涉山川蒙犯霜露以逞
君心小國將君是望敢不唯命是聽無乃非盟載之言
以闕君德而執事有不利焉小國是懼不然其何勞之

敢憚子大叔歸復命告子展曰楚子將死矣不修其政

德而貪昧於諸侯以逞其願欲久得乎周易有之在復

三三

震下坤上

之頤

三三

震下艮上

曰迷復凶其楚子之謂乎欲

復其願而弃其本復歸無所是謂迷復能無凶乎君其

往也送葬而歸以快楚心楚不幾十年未能恤諸侯也

吾乃休吾民矣裨竈曰今茲周王及楚子皆將死歲弃

其次而旅於明年之次以害鳥帑

歲弃星紀之次客在玄枵歲星所在其國

有福失次於北禍衝在南南爲朱鳥鳥尾曰帑鶉火鶉尾周楚之分故受其咎俱論歲星過次梓慎曰宋鄭饑

裨竈曰周楚王死傳故備

舉以示卜占楚人所在 九月鄭游吉如晉告將朝于

楚子產相鄭伯以如楚舍不爲壇

至敵國郊爲壇受郊勞

外僕言

曰昔先大夫相先君適四國未嘗不爲壇自是至今亦
皆循之今子草舍無乃不可乎子產曰大適小則爲壇
小適大苟舍而已焉用壇僑聞之大適小有五美宥其
罪戾赦其過失救其蓄患賞其德刑教其不及小國不
困懷服如歸是故作壇以昭其功宣告後人無怠於德
小適大有五惡說其罪戾請其不足行其政事共其職

貢從其時命不然則重其幣帛以賀其福而弔其凶皆
小國之禍也焉用作壇以昭其禍所以告子孫無昭禍
焉可也冬公及宋公陳侯鄭伯許男如楚及漢楚康王
卒公欲反叔仲昭伯曰我楚國之爲豈爲一人行也子
服惠伯曰君子有遠慮小人從邇飢寒之不恤誰遑其
後不如姑歸也叔孫穆子曰叔仲子專之矣子服子始
學者也榮成伯曰遠圖者忠也公遂行宋向戌曰我一
人之爲非爲楚也飢寒之不恤誰能恤楚姑歸而息民

待其立君而爲之備宋公遂反楚屈建卒趙文子喪之

如同盟禮也

終伯犁之言

三十一年公作楚宮穆叔曰大

誓云民之所欲天必從之君欲楚也夫故作其宮若不復適楚必死是宮也六月公薨于楚宮

楚蔦掩得治國之體

楚蔦掩爲司馬子木使庀賦數甲兵蔦掩書土田

土地之宜

度山林鳩藪澤

聚成藪澤以備田獵

辨京陵

爲冢墓

表淳鹵

淳鹵地薄之地

表之輕賦稅

數疆潦

疆界有流潦則計數減租

規偃豬

受水多少

町原防

隄防間地

不方正如井田
則爲小頃町

牧隰臯井衍沃量入修賦賦車籍馬賦

車兵甲士徒兵甲楯之數旣成以受子木禮也

二十六年

晉叔向召行人子員

秦伯之弟鍼如晉修成叔向命召行人子員行人子朱
曰朱也當御三云叔向不應子朱怒曰班爵同何以黜
朱於朝撫劍從之叔向曰秦晉不和久矣今日之事幸
而集不集三軍暴骨子員道二國之言無私子常易之

姦以事君者吾所能御也拂衣從之人救之平公曰晉其庶乎吾臣之所爭者大師曠曰公室懼卑臣不心競而力爭不務德而爭善私欲已侈能無卑乎

鄭請印堇父

楚子秦人侵吳遂侵鄭鄭皇頡與楚師戰敗穿封戌囚皇頡公子圍與之爭之正於伯州犁伯州犁曰請問於囚伯州犁上其手曰夫子爲王子圍寡君之貴介弟也下其手曰此子爲穿封戌方城外之縣尹也誰獲子囚

曰頡遇王子弱焉戍怒抽戈逐王子圍弗及楚人以皇
頡歸囚印堇父以獻于秦鄭人取貨於印氏以請之子
大叔爲令正以爲請子產曰不獲受楚之功而取貨於
鄭不可謂國秦不其然若曰拜君之勤鄭國微君之惠
楚師其猶在敝邑之城下其可弗從遂行秦人不予更
幣從子產而後獲之

宋左師伊戾殺大子

初宋芮司徒生女子赤而毛弃諸堤下共姬之妾取以

入名之曰弃長而美平公入夕共姬與之食公見弃也

而視之尤姬納諸御嬖生佐惡而婉大子瘞美而狠合

左師畏而惡之寺人惠牆伊戾爲大子內師而無寵秋

楚客聘於晉過宋大子知之請野享之公使往伊戾請

從之至則欲用牲加書徵之而聘告公曰大子將爲亂

既與楚客盟矣公曰爲我子又何求對曰欲速公使視

之則信有焉問諸夫人與左師則皆曰固聞之公囚大

子大子曰唯佐也能免我召而使請曰日中不來吾知

死矣左師聞之聒而與之語過期乃縊而死佐爲大子
公徐聞其無罪也乃烹伊戾左師見夫人之步馬者問
之對曰君夫人氏也左師曰誰爲君夫人余胡弗知圉
人歸以告夫人夫人使饋之錦與馬先之以王曰君之
妾弃使某獻左師改命曰君夫人而後再拜稽首受之
楚聲子復椒舉

初楚伍參與蔡大師友其子伍舉與聲子相善也伍舉
娶於王子牟王子牟爲申公而亡楚人曰伍舉實送之

伍舉奔鄭將遂奔晉聲子將如晉遇之於鄭郊班荆相與食而言復故聲子曰子行也吾必復子及宋向戌將平晉楚聲子通使於晉還如楚令尹子木問晉故焉且曰楚大夫與楚孰賢對曰晉卿不如楚其大夫則賢皆卿材也如杞梓皮革自楚往也雖楚有材晉實用之子木曰夫獨無族姻乎對曰雖有而用楚材實多歸生聞之善爲國者賞不僭而刑不濫賞僭則懼及淫人刑濫則懼及善人若不幸而過寧僭無濫與其失善寧其利

淫無善人則國從之詩曰人之云亡邦國殄瘁無善人
之謂也故夏書曰與其殺不辜寧失不經懼失善也商
頌有之曰不僭不濫不敢怠皇命于下國封建厥福此
湯所以獲天福也古之治民者勸賞而畏刑恤民不倦
賞以春夏刑以秋冬是以將賞爲之加膳加膳則飫賜
此以知其勸賞也將刑爲之不舉不舉則徹樂此以知
其畏刑也夙興夜寐朝夕臨政此以知其恤民也三者
禮之大節也有禮無敗今楚多淫刑其大夫逃死於四

方而爲之謀主以害楚國不可救療所謂不能也子儀之亂析公奔晉晉人寘諸戎車之殿以爲謀主繞角之役晉將遁矣析公曰楚師輕窳易震蕩也若多鼓均聲以夜軍之楚師必遁晉人從之楚師宵潰晉遂侵蔡襲沈獲其君敗申息之師於桑隧鄭於是不敢南面楚失華夏則析公之爲也雍子之父兄譖雍子君與夫人不善是也雍子奔晉晉人與之郤以爲謀主彭城之役晉楚遇於靡角之谷晉將遁矣雍子發命於軍曰歸老幼

反孤疾二人役歸一人簡兵蒐乘秣馬蓐食師陳楚次
楚次未必死明日將戰行歸者而逸楚囚楚師宵潰晉降彭

城而歸諸宋以魚石歸楚失東夷子辛死之則雍子之
爲也子反與子靈爭夏姬而雍害其事子靈奔晉晉人
與之邢以爲謀主扞禦北狄通吳於晉教吳叛楚教之
乘車射御驅侵吳於是伐巢取駕克棘入州來楚罷於
奔命至今爲患則子靈之爲也若教之亂伯賁之子賁
皇奔晉晉人與之苗以爲謀主鄢陵之役楚晨壓晉軍

而陳晉將遁矣苗賁皇曰楚師之良在其中軍王族而

已若塞井夷竈成陳以當之藥范易行以誘之

簡易兵備欲令

楚貪已不復

中行二卻必克二穆

子重子辛

吾乃四萃於其

顧二穆之兵

王族必大敗之晉人從之楚師大敗王夷師燬子反死

之鄭叛吳興楚失諸侯則苗賁皇之爲也子木曰是皆

然矣聲子曰今又有甚於此椒舉娶於申公子牟子牟

得戾而亡君大夫謂椒舉女實遣之今在晉矣晉人將

與之縣以比叔向彼若謀害楚國豈不爲患子木懼益

其祿爵而復之聲子使椒鳴舉逆之子逆之

韓宣子辭不失舊

晉韓宣子聘于周王使請事對曰晉士起將歸時事於
宰旅無他事矣王聞之曰韓氏其昌阜於晉乎辭不失舊
晉趙文取喪邑復諸侯

齊人城郊之歲其夏齊烏餘以廩丘奔晉襲衛羊角取
之遂襲我高魚又取邑于宋於是范宣子卒諸侯弗能
治也及趙文子爲政乃卒治之言於晉侯曰晉爲盟主

諸侯或相侵也則討之而使歸其地今烏餘之邑皆討類也請歸之公曰諾孰可使也對曰胥梁帶能無用師晉侯使往二十七年胥梁帶使諸喪邑者具車徒以受地必周使烏餘具車徒以受封烏餘以其衆出而遂執之皆取其邑而歸諸侯諸侯是以睦於晉

二十八年

無冰宋鄭其饑

春無冰梓慎曰今茲宋鄭其饑乎歲在星紀而淫於玄

枵星紀在丑斗牛之次以有時蓄陰不堪陽陰用事而無冰是陰

不堪蛇乘龍蛇玄武之宿虛危之次歲星木木青龍失次出虛危下爲蛇所乘龍宋鄭

之星也歲星東方東方房心爲宋角亢爲鄭宋鄭必饑玄枵虛中也玄枵三星

虛星枵耗名也土虛而民耗不饑何爲

子產知蔡景侯不免

蔡侯朝于晉秋歸自晉入享于鄭不敬子產曰蔡侯其不免乎日其過此也君使子展廷勞於東門之外而傲吾曰猶將更之今還受享而惰乃其心也君小國事大

國而情傲以爲己心將得死乎若不免必由其子其爲君也淫而不父僑聞之如是者恒有子禍三十年蔡景侯爲太子般娶于楚通焉太子弑之

鄭伯有侈愎而死

爲宋之盟公如楚過鄭鄭伯不在伯有廷勞於黃崖不敬穆叔曰伯有無戾於鄭鄭必有大咎敬民之主也而弃之何以承守鄭人不討必受其辜濟澤之阿行潦之蘋藻寘諸宗室季蘭尸之敬也敬可弃乎二十九年

伯有使公孫黑如楚辭曰楚鄭方惡而使余往是殺余

也伯有曰世行也

世爲
行人

子皙曰可則往難則已何世之

有伯有將強使之子皙怒將伐伯有氏大夫和之十二

月鄭大夫盟於伯有氏裨諶曰是盟也其與幾何詩曰

君子屢盟亂是用長今是長亂之道也禍未歇也必三

年而後能紓然明曰政將焉往裨諶曰善之代不善天

命也其焉辟子產舉不踰等則位班也擇善而舉則世

隆也天又除之奪伯有魄子西即世將焉辟之天禍鄭

久矣其必使子產息之乃猶可以戾不然將亡矣 三
十年子產相鄭伯以如晉叔向問鄭國之政焉對曰吾
得見與否在此歲也馬良方爭未知所成若有所成吾
得見乃可知也叔向曰不旣和矣乎對曰伯有侈而愎
子皙好在人上莫能相下也雖其和也猶相積惡也惡
至無日矣夏鄭伯及其大夫盟君子是以知鄭難之不
已也鄭伯有耆酒爲窟室而夜飲酒擊鍾焉朝至未已
朝者曰公焉在其人曰吾公在壑谷皆自朝布路而罷

既而朝又將使子皙如楚歸而飲酒子皙以駟氏之甲

伐而焚之遂奔許大夫聚謀子皮曰仲虺之志云亂者

取之亡者侮之推亡固存國之利也罕駟豐同生罕子皮駟

子皙豐公孫段伯有汰侈故不免三家同出而伯有孤特又汰侈所以亡人謂子

產就直助強子產曰豈爲我徒不以二氏爲黨國之禍難誰知

所敝或主彊直難乃不生姑成吾所欲以無所附著爲所子產歛

伯有氏之死者而殯之不及謀而遂行印段從之義子產

子皮曰夫子禮於死者況生者乎遂自止之鄭伯及其

大夫盟于大宮盟國人于師之梁之外伯有聞鄭人之盟己也怒聞子皮之甲不與攻己也喜曰子皮與我矣自墓門之潰入因馬師頡子羽介于襄庫以伐舊北門

馬駟帶帥國人以伐之皆召子產子產曰兄弟而及此吾從天所與伯有死於羊肆子產櫬之枕之股而哭之既而葬諸斗城子駟氏欲攻子產子皮怒之曰禮國之幹也殺有禮禍莫大焉乃止於是游吉如晉還不入復命于介八月奔晉馬駟帶追之用兩珪質于河己已復歸於

子蟜之卒也

年十九

將葬公孫揮與裨竈晨會事焉過伯

有氏其門上生莠子羽曰其莠猶在乎於是歲在降婁
降婁中而旦裨竈曰猶可以終歲歲不及此次也已及
其亡也歲在娵訾之口 昭七年鄭人相驚以伯有曰

伯有至矣則皆走不知所往鑄刑書之歲二月或夢伯

有介而行曰壬子余將殺帶也明年壬寅余又將殺段

也及壬子駟帶卒國人益懼齊燕平之月

此年正月

壬寅公

孫段卒國人愈懼其明月子產立公孫洩及良止以撫

之乃止子大叔問其故子產曰鬼有所歸乃不爲厲吾

爲之歸也大叔曰公孫洩何爲子產曰說也爲身無義

而圖說伯有無義以妖鬼故立恐惑民并立洩使從政

有所反之以取媚也民不可使知之故不媚不信不信

民不從也及子產適晉趙景子問焉曰伯有猶能爲鬼

乎子產曰能人生始化曰魄既生魄陽曰魂用物精多

則魂魄彊是以有精爽至於神明匹夫匹婦強死其魂

魄猶能馮依於人以爲淫厲況良霄我先君穆公之冑

子良之孫子耳之子敝邑之卿從政三世矣鄭雖無腴
抑諺曰蕞爾國而三世執其政柄其用物也弘矣其取
精也多矣其族又大所馮厚矣而強死能爲鬼不亦宜乎

二十九年

公治致其邑於季氏

公如楚還及方城季武子取卞使公治問璽書追而與
之曰聞守卞者將叛臣帥徒以討之旣得之矣敢告公
治致使而退及舍而後聞取卞公謂公冶曰吾可以入

乎對曰君實有國誰敢違君公與公冶冕服固辭強之而後受五月公至自楚公冶致其邑於季氏而終不入焉曰欺其君何必使余及疾聚其臣曰我死必無以冕服斂非德賞也且無使季氏葬我

鄭罕宋樂施而不德

鄭子展卒子皮即位於是鄭饑而未及麥民病子皮以子展之命餽國人粟戶一鍾是以得鄭國之民故罕民常掌國政以爲上卿宋司城子罕聞之曰鄰於善民之

望也宋亦饑請於平公出公粟以貸使大夫皆貸司城
貸而不書爲大夫之無者貸宋無飢人叔向聞之曰鄭
之罕宋之樂其後亡者也二者其皆得國乎民之歸也
施而不德樂氏加焉其以宋升降乎

晉平公城杞

晉平公杞出也故治杞六月知悼子合諸侯之大夫以
城杞鄭子大叔見大叔文子與之語文子曰甚乎其城
杞也子大叔曰若之何哉晉國不恤宗周之闕而夏肄

是屏其弃諸姬亦可知也已諸姬是弃其誰歸之吉也
聞之弃同即異是謂離德詩曰協比其鄰昏姻孔云晉
不鄰矣其誰云之晉侯使司馬女叔侯來治杞田弗盡
歸也晉悼夫人愠曰齊也取貨先君若有知也不尚取
之公告叔侯叔侯曰杞夏餘也而即東夷魯周公之後
也而睦於晉以杞封魯猶可而何有焉魯之於晉也職
貢不乏玩好時至公卿大夫相繼於朝史不絕書府無
虛月如是可矣何必瘠魯以肥杞且先君而有知也毋

寧夫人而焉用老臣 三十年晉悼夫人食似輿人之

城杞者絳縣人或年長矣無子而往與於食有與疑年

使之年曰臣小人也不知紀年臣生之歲正月甲子朔

四百有四十五甲子矣其季於今三之一也正月夏正月也三分

六甲之一得甲更走問諸朝師曠曰魯叔仲惠伯會卻

成子于承匡之歲也六十一年是歲也狄伐魯叔孫莊叔敗

狄于鹹獲長狄僑如及虺也豹也而皆以名其子七十

三年矣史趙曰亥有二首六身亥字二畫在上併三六爲身如筭之六下

二如身是其日數也士文伯曰然則二萬六千六百有

六旬也趙孟問其縣大夫則其屬也召之而謝過焉曰

武不才任君之大事以晉國之多虞不能由吾子使吾

子辱在泥塗久矣武之罪也敢謝不才遂仕之使助爲

政辭以老與之田使爲君復陶以爲絳縣師

復陶主衣服之官縣

師掌地域辨人民

而廢其輿尉

役孤老故

於是魯使者在晉歸以語

諸大夫季武子曰晉未可媿也有趙孟以爲大夫有伯
瑕以爲佐有史趙師曠而咨度焉有叔向女齊以師保

其君其朝多君子其庸可媿乎勉事之而後可 昭七

年公如楚孟僖子爲介晉人來治杞田

前女叔不盡歸公如楚晉悵之

故復來治

季孫將以成與之謝息爲孟孫守不可曰人有言

曰雖有挈瓶之知守不假器禮也夫子從君而守臣喪

邑雖吾子亦有猜焉季孫曰君之在楚於晉罪也又不

聽晉晉師必至吾無以待之不如與之間晉而取諸杞

吾與子桃成反誰敢有之是得二成也魯無憂而孟孫

益邑子何病焉辭以無山與之萊柞乃遷于桃晉人爲

杞取成

吳公子札請觀周樂

吳公子札來聘見叔孫穆子說之謂穆子曰子其不得死乎好善而不能擇人吾聞君子務在擇人吾子爲魯宗卿而任其大政不慎舉何以堪之禍必及子請觀於周樂使工爲之歌周南召南曰美哉始基之矣猶未也然勤而不怨矣爲之歌邶鄘衛曰美哉淵乎憂而不困者也衛唐叔武公德化深遠故遭宣公淫亂懿公滅亡民猶秉義不至於困也吾聞衛康叔

武公之德如是是其衛風乎爲之歌王曰美哉思而不

懼其周之東乎

宗周隕滅政夏思猶爲先王之風故不懼

爲之歌鄭曰美哉

其細已甚民弗堪也是其先亡乎爲之歌齊曰美哉泂

泂

弘大之聲

乎大風也哉表東海者其大公乎國未可量也

爲之歌豳曰美哉蕩乎樂而不淫其周公之東乎爲之

歌秦曰此之謂夏聲夫能夏則大大之至也其周之舊

乎

秦仲始有禮樂去西戎之音而有諸夏之聲故曰夏聲

爲之歌魏曰美哉泂泂

扶乎大而婉險而易行以德輔此則明主也

泂泂中庸之聲婉約

也險當爲儉也大而約則儉節而易行

爲之歌唐曰思

息嗣

深哉其有陶唐

氏之遺民乎不然何憂之遠也非令德之後誰能若是

爲之歌陳曰國無主其能久乎

淫聲放蕩故國無主

自鄆以下無

譏焉爲之歌小雅曰美哉思而不貳

思文武之德而不叛

怨而不

言其周德之衰乎猶有先王之遺民焉

有商餘俗故未失

爲之

歌大雅曰廣哉熙熙乎曲而有直體其文王之德乎爲

之歌頌曰至矣哉直而不倨曲而不屈邇而不偏遠而

不攜遷而不淫復而不厭哀而不愁樂而不荒用而不

匱廣而不宣施而不費取而不貪處而不底行而不流
五聲和八風平節有度守有序盛德之所同也見舞象
箚南籥者曰美哉猶有憾見舞大武者曰美哉周之盛
也其若此乎見舞韶濩者曰聖人之弘也而猶有慙德
聖人之難也見舞大夏者曰美哉勤而不德非禹其誰
能修之見舞韶箚者曰德至矣哉大矣如天之無不幬
也如地之無不載也雖甚盛德其蔑以加於此矣觀止
矣若有他樂吾不敢請已其出聘也通嗣君也故遂聘

于齊說晏平仲謂之曰子速納邑與政無邑無政乃免於難齊國之政將有所歸未獲所歸難未歇也故晏子因陳桓子以納政與邑故免於藥高之難聘於鄭見子產如舊相識與之縞帶子產獻紵衣焉

吳貴縞鄭貴紵各獻所貴示損

已而不爲貨利也

謂子產曰鄭之執政侈難將至矣政必及子

子爲政慎之以禮不然鄭國將敗適衛說蘧瑗史狗史鮪公子荆公叔發公子朝曰衛多君子未有患也自衛如晉將宿於戚聞鍾聲焉曰異哉吾聞之也辯而不德

必加於戮夫子獲罪於君以在此懼猶不足而又何樂
夫子之在此也猶燕之巢于幕上君又在殯而可以樂
乎遂去之文子聞之終身不聽琴瑟適晉說趙文子韓
宣子魏獻子曰晉國其萃於三族乎說叔向曰吾子勉
之君侈而多良大夫皆富政將在家吾子好直必思自
免於難

齊放其大夫高止

齊公孫薑公孫窻放其大夫高止於北燕書曰出奔罪

高止也高止好以事自爲功且專故難及之高豎以盧
叛閭丘嬰帥師圍盧高豎曰苟使高氏有後請致邑齊
人立敬仲之曾孫燕良敬仲也高豎致盧而奔晉

三十年

楚令尹圍行大事

楚子使薳罷來聘通嗣君也穆叔問王子之爲政何如
對曰吾儕小人食而聽事猶懼不給命而不免於戾焉
與知政固問焉不告穆叔曰楚令尹將有大事子蕩將

與焉助之匿其情矣 三十一年衛侯在楚北宮文子

見令尹圍之威儀言於衛侯曰令尹似君矣將有他志
雖獲其志不能終也詩云靡不有初鮮克有終終之實
難令尹其將不免公曰子何以知之對曰詩云敬慎威
儀唯民之則令尹無威儀民無則焉民所不則以在民
上不可以終公曰善哉何謂威儀對曰有威可畏謂之
威有儀可象謂之儀君有君之威儀其臣畏而愛之則
而象之故能有其國家令聞長世臣有臣之威儀其下

畏而愛之故能守其官職保族宜家順是以下皆如是
是以上下能相固也衛詩曰威儀棣棣不可選也言君
臣上下父子兄弟内外大小皆有威儀也周詩曰朋友
攸攝攝以威儀言朋友之道必相教訓以威儀也周書
數文王之德曰大國畏其力小國懷其德言畏而愛之
也詩云不識不知順帝之則言則而象之也紂囚文王
七年諸侯皆從之囚紂於是乎懼而歸之可謂愛之文
王伐崇再駕而降爲臣蠻夷帥服可謂畏之文王之功

天下誦而歌舞之可謂則之文王之行至今爲法可謂
象之有威儀也故君子在位可畏施舍可愛進退可度
周旋可則容止可觀作事可法德行可象聲氣可樂動
作有文言語有章以臨其下謂之有威儀也 昭元年

楚公子圍聘于鄭且娶於公孫段氏伍舉爲介將入館
鄭人惡之使館于外既聘將以衆逆子產患之使子羽

辭曰以敝邑褊小不足以容從者請墀聽命

爲墀行昏禮

令

尹命大宰伯州犂對曰君辱貺寡大夫圍謂圍將使豐

氏撫有而室圍布几筵告於莊共之廟而來若野賜之
是委君貺於草莽也是寡大夫不得列於諸卿也不寧
唯是又使圍蒙其先君將不得爲寡君老其蔑以復矣
唯大夫圖之子羽曰小國無罪恃實其罪將恃大國之
安靖已而無乃包藏禍心以圖之小國失恃而懲諸侯
使莫不憾者距違君命而有所壅塞不行是懼不然敝
邑館人之屬也其敢愛豐氏之祧伍舉知其有備也請
垂橐而入許之入逆而出遂會于號尋宋之盟也祁午

謂趙文子曰宋之盟楚人得志於晉今令尹之不信諸

侯之所聞也子弗戒懼又如宋楚重得志於晉晉之恥

也子相晉國以爲盟主於今七年矣再合諸侯襄二十五年會

夷儀二十六年會澶淵三合大夫二十七年會宋三十服齊狄寧

東夏平秦亂二十六年秦成城渚于渚于二十九年城師徒不頓國

家不罷民無謗讟諸侯無怨天無大災子之力也有令

名矣而終之以恥午也是懼吾子其不可以不戒文子

曰武受賜矣然宋之盟子未有禍人之心武有仁人之

心是楚所以駕於晉也今武猶是心也楚又行僭非所

害也武將信以爲本循而行之譬如農夫是穠是莠雖

有饑饉必有豐年且吾聞之能信不爲人下吾未能也

詩曰不僭不賊鮮不爲則信也能爲人則者不爲人下

矣吾不能是難楚不爲患三月甲辰盟楚公子圍設服

離衛叔孫穆子曰楚公子美矣君哉鄭子皮曰二執戈

者前矣蔡子家曰蒲宮

緝蒲爲正宮

有前不亦可乎楚伯州

犁曰此行也辭而假之寡君鄭行人揮曰假不反矣伯

州犁曰子姑憂子皙之欲背誕也子羽曰當璧猶在假

而不反子其無憂乎齊國子曰吾代二子愍矣

圍纂不終州犁

見殺故可愍

陳公子招曰不憂何成二子樂矣

以憂生事衛事成而樂衛

齊子曰苟或知之雖憂何害宋合左師曰大國令小國

共吾知共而已晉樂王鮒曰小旻之卒章善矣吾從之

義取暴虎馮河之可畏不敬小人亦危殆鮒從斯義故不敢譏議公子圍

退會子羽謂子皮

曰叔孫絞而婉宋左師簡而禮樂王鮒字而敬子與子

家持之皆保世之主也齊衛陳大夫其不免乎國子代

人憂子招樂憂齊子雖憂弗害夫弗及而憂與可憂而

樂與憂而弗害皆取憂之道也憂必及之大誓曰民之

所欲天必從之三大夫兆憂憂能無至乎言以知物

物類

也禍福之類

其是之謂矣秋楚公子圍使公子黑肱伯州犂城

犂樂邾邑

鄭人懼子產曰不害令尹將行大事而先除

二子也禍不及鄭何患焉冬楚公子圍將聘于鄭伍舉

爲介未出竟聞王有疾而還伍舉遂聘十一月己酉公

子圍入問王疾縊而弑之遂殺其二子幕及平夏右尹

子干出奔晉比三子宮廐尹子皙奔鄭肱黑殺伯州犂于邲

葬王于邲謂之邲敖使赴于鄭伍舉問應爲後之辭焉
對曰寡大夫圍伍舉更之曰共王之子圍爲長

宋災

或叫于宋大廟曰喜喜熱貌出出戒伯鳥鳴于亳社如曰

喜喜宋大災伯姬卒待姆也君子謂宋共姬女而不婦
女待人婦義事也爲宋災故諸侯之大夫會以謀歸宋
財冬十月叔孫豹會晉趙武齊公孫蠆宋向戌衛北宮

佗鄭罕虎及小邾之大夫會于澶淵既而無歸於宋故
不書其人君子曰信其不可不慎乎澶淵之會卿不書
不信也夫諸侯之上卿會而不信寵名皆弃不信之不
可也如是詩曰文王陟降在帝左右信之謂也又曰淑
慎爾止無載爾僞不信之謂也書曰某人某人會于澶
淵宋災故尤之也

楚滅陳蔡

鄭子產如陳涖盟歸復命告大夫曰陳亡國也不可與

也聚禾粟繕城郭恃此二者而不撫其民其君弱植公
子侈大子卑大夫敖政多門以介於大國能無亡乎不
過十年矣 昭八年陳哀公元妃鄭姬生悼大子偃師
二妃生公子留下妃生公子勝二妃嬖留有寵屬諸司
徒招與公子過哀公有廢疾三月甲申公子招公子過
殺悼大子偃師而立公子留四月哀公縊于徵師赴于
楚且告有立君公子勝愬于楚楚人執而殺之公子留
奔鄭秋公子招歸罪於公子過而殺之楚公子弃疾帥

師奉孫吳

偃師子惠公

圍陳冬十一月滅陳與嬖袁克殺馬

毀玉以葬

輿衆也袁克嬖人之貴者

楚人將殺之請寘之既又請私

私於幄加絰於顙而逃使穿封戌爲陳公曰城麋之役

不諂

與靈王爭皇顙

侍飲酒於王王曰城麋之役女知寡人之

及此女其辟寡人乎對曰若知君之及此臣必致死禮

以息楚國晉侯問於史趙曰陳其遂亡乎對曰未也陳

顙頊之族也歲在鶉火是以卒滅陳將如之

火盛而水滅

今

在析木之津猶將復由且陳氏得政于齊而後陳卒亡

自幕至于瞽叟無違命舜重之以明德寘德於遂遂世

守之及胡公不淫故周賜之姓使祀虞帝臣聞盛德必
百世祀虞之世數未也繼守將在齊其兆旣存矣 九

年四月陳災鄭裨竈曰五年陳將復封封五十二年而

遂亡子產問其故對曰陳水屬也火水妃也而楚所相

也相治也楚先祝融今火出而火陳逐楚而建陳也水

妃而興陳妃以五成故曰五年妃合也五行各相妃合

復歲五及鶡火而後陳卒亡楚克有之天之道也故曰

五十二年

是歲在星紀五歲及大梁而陳復封自大梁四歲而及鶉火後四周四十八歲凡五及鶉

火天以五爲紀

十一年景王問於萇弘曰今茲諸侯

歲五而水衰

何實吉何實凶對曰蔡凶此蔡侯般弑其君之歲也歲

在豕韋

襄三十年般弑君歲在豕韋今十三歲又在豕韋

弗過此矣楚將有之

然壅也歲在大梁蔡復楚凶天之道也

靈王弑立之歲歲在大梁昭十

三年歲復在大梁故知楚凶

楚子在申召蔡靈侯蔡大夫曰幣重而

言甘誘我也不如無往蔡侯不可三月楚子伏甲而饗

蔡侯於申醉而執之夏四月丁巳殺之刑其士七十人

公子弃疾帥師圍蔡韓宣子問於叔向曰楚其克乎對
曰克哉蔡侯獲罪於其君而不能其民天將假手於楚
以斃之何故不克然肸聞之不信以幸不可再也楚王
奉孫吳以討於陳曰將定而國陳人聽命而遂縣之今
又誘蔡而殺其君以圍其國雖幸而克必受其咎弗能
久矣桀克有緡以喪其國紂克東夷以隕其身楚小位
下而亟暴於二王能無咎乎天之假助不善非祚之也
厚其凶惡而降之罰也且譬言之如天其有五材而將用

之力盡而敝之是以無拯不可沒振五月楚師在蔡晉
荀吳謂韓宣子曰不能救陳又不能救蔡晉之不能亦
可知也已爲盟主而不恤亡國將焉用之秋會于厥慙
謀救蔡也鄭子皮將行子產曰行不遠不能救蔡也蔡
小而不順楚大而不德天將弃蔡以壅楚盈而罰之蔡
必亡矣且喪君而能守者鮮矣三年王其有咎乎美惡
周必復王惡周矣晉人使狐父請蔡于楚弗許冬十一
月楚子滅蔡用隱大子于岡山申無宇曰不祥五牲不

相爲用況用諸侯乎王必悔之十二月使弃疾爲蔡公
十三年平王即位復封陳蔡隱太子之子廬歸于蔡
悼太子之子吳歸于陳禮也

楚靈王之死平王之立

楚公子圍殺大司馬蔣掩而取其室申無宇曰王子必
不免善人國之主也王子相楚國將善是封殖而虐之
是禍國也且司馬令尹之偏而王之四體也絕民之主
去身之偏艾王之體以禍其國無不祥大焉何以得免

昭元年楚公子圍聘于鄭爲會於虢令尹享趙孟賦

大明之荀章

明明在下赫赫在上特稱以自光大

趙孟賦小宛之二章

各敬

爾儀天命不又

以戒令尹事畢趙孟謂叔向曰令尹自以爲王矣何

如對曰王弱令尹彊其可哉雖可不終趙孟曰何故對
曰彊以克弱而安之彊不義也不義而彊其斃必速詩
曰赫赫宗周褒姒滅之彊不義也令尹爲王必求諸侯
晉少懦矣若獲諸侯其虐滋甚民弗堪也將何以終夫
以彊取不義而克必以爲道道以淫虐弗可久也已冬

楚公子圍入問王疾縊而弑之十一月楚靈王即位鄭
游吉如楚歸謂子產曰具行器矣楚王汰侈而自說其
事必合諸侯吾往無日矣子產曰不數年未能也 四
年許男如楚楚子止之遂止鄭伯復田江南使椒舉如
晉求諸侯二君待之椒舉致命曰日君有惠賜盟于宋
曰晉楚之從交相見也以歲之不易寡人願結驩於二
二君使舉請聞君若苟無四方之虞則願假寵以請於
諸侯晉侯欲勿許司馬侯曰不可楚王方侈天或者欲

逞其心以厚其毒而降之罰未可知也其使能終亦未可知也晉楚唯天所相不可與爭公曰晉有三不殆其何敵之有國險而多馬齊楚多難有是三者何卿而不濟對曰是三殆也四嶽三塗陽城大室荆山中南九州之險也是不一姓冀之北土馬之所生無興國焉恃險與馬不可以爲固也從古以然是以先王務修德音以享神人不聞其務險與馬也鄰國之難不可虞也或多難以固其國啓其疆土或無難以喪其國失其守宇若

何虞難齊有仲孫之難而獲桓公至今賴之晉有里克之難而獲文公是以爲盟主衛邢無難敵亦喪之故人之難不可虞也恃此三者而不修政德亡於不暇又何能濟紂作淫虐文王惠和殷是以隕周是以興夫豈爭諸侯乃使叔向對曰寡君有社稷之事是以不獲春秋時見諸侯君實有之何辱命焉楚子問於子產曰晉其許我諸侯乎對曰許君晉君少安不在諸侯其大夫多求莫匡其君在宋之盟又曰如一若不許君將焉用之

王曰諸侯其來乎對曰必來不來者其魯衛曹邾乎曹
畏宋邾畏魯魯衛偏於齊而親於晉唯是不來其餘君
之所及也王曰然則吾所求者無不可乎對曰求逞於
人不可與人同欲盡濟夏諸侯如楚魯衛曹邾不會六
月楚子合諸侯于申椒舉言於楚子曰臣聞諸侯無歸
禮以爲歸今君始得諸侯其慎禮矣霸之濟否在此會
也夏啟有鈞臺之享商湯有景亳之命周武有孟津之
誓成有岐陽之蒐康有豐宮之朝穆有塗山之會齊桓

有召陵之師晉文有踐土之盟君其何用宋向戌鄭公
孫僑在諸侯之良也君其選焉王曰吾用齊桓王使問
禮於左師與子產左師曰小國習之大國用之敢不薦
聞獻公合諸侯之禮六子產曰小國共職敢不薦守獻
伯子男會公之禮六君子謂合左師善守先代子產善
相小國楚子示諸侯侈椒舉曰夫六王二公之事皆所
以示諸侯禮也諸侯所由用命也夏桀爲仍之會有緡
叛之商紂爲黎之蒐東夷叛之周幽爲大室之盟戎狄

叛之皆所以示諸侯汰也諸侯所由弃命也今君以汰

無乃不濟乎王弗聽子產見左師曰吾不患楚矣汰而

愎諫不過十年左師曰然不十年侈其惡不遠遠惡而

後棄

惡及遠方則民棄之

善亦如之德遠而後興楚子遂以諸侯

滅賴遷賴於鄢欲遷許於賴使鬬韋龜與公子弃疾城

之而還申無宇曰楚禍之首將在此矣召諸侯而來伐

國而克城竟莫校王心不違民其居乎民之不處其誰

堪之不堪王命乃禍亂也六年楚公子弃疾如晉過

鄭鄭罕虎公孫僑游吉從鄭伯以勞諸相辭不敢見固
請見之見如見王以其乘馬八匹私面見子皮如上卿
以馬六匹見子產以馬四匹見子大叔以馬二匹禁芻
牧採樵不入田不樵樹不採蓺不抽屋不強白誓曰有
犯命者君子廢小人降舍不爲暴主不恩賔往來如是
鄭三卿知其將爲王也 七年楚子之爲令尹也爲王
旌以田芋尹無宇斷之曰一國兩君其誰堪之及即位
爲章華之宮納亡人以實之無宇之闡入焉無宇執之

有司弗與 執而謁諸王王將飲酒無宇辭曰天子經
略諸侯正封古之制也封略之內何非君土食土之毛
誰非君臣故詩曰普天之下莫非王土率土之濱莫非
王臣天有十日人有十等下所以事上上所以共神也
故王臣公公臣大夫大夫臣士士臣皐皐臣輿輿臣隸
隸臣僚僚臣僕僕臣臺馬有圉牛有牧以待百事今有
司曰女胡執人於王宮將焉執之周文王之法曰有亡
荒閱所以得天下也吾先君文王作僕區之法曰盜所

隱器與盜同罪所以封汝也若從有司是無所執逃臣也逃而舍之是無陪臺也王事無乃闕乎昔武王數紂之罪曰紂爲天下逋逃主萃淵藪故夫致死焉君王始求諸侯而則紂無乃不可乎若以二文之法取之盜有所在矣王曰取而臣以往盜有寵未可得也遂赦之

八年冬滅陳使穿封戌爲陳公 十一年冬滅蔡城陳

蔡不羹使弃疾爲蔡公王問於申無宇曰弃疾在蔡何如對曰擇子莫如父擇臣莫如君鄭莊公城櫟而寘子

元焉使昭公不立齊桓公穀而寔管仲焉至于今賴

之臣聞五大不在邊五細不在庭

上古金木水火土曰五官玄鳥丹鳥氏亦

有五五鳩鳩民五雉爲工正皆立官之本也末世隨事

施職故官無常數

五大五官之長專威過節不可居邊

細弱不勝任者亦不可居朝廷

親不在外羈不在內今弃疾在外鄭丹

在內君其少戒王曰國有大城何如對曰鄭京櫟實殺

曼伯宋蕭亳實殺子游齊渠丘實殺無知衛蒲戚實出

獻公若由是觀之則害於國末大必折尾大不掉君所

知也十二年楚子狩于州來次于潁尾使蕩侯潘子

司馬督囂尹午陵尹喜帥師圍徐以懼吳楚子次于乾

谿以爲之援雨雪王皮冠秦復陶

秦所遺羽衣

翠被豹舄執

鞭以出僕析父從右尹子革夕王見之去冠被舍鞭與

之語曰昔我先王熊繹與呂級王孫牟

康叔子

變父

晉康叔子

禽父

伯禽

並事康王四國皆有分我獨無有今吾使人於

周求鼎以爲分王其與我乎對曰與君王哉昔我先王

熊繹辟在荆山篳路藍縷以處草莽跋涉山林唯是桃

弧棘矢

以禦不祥

以共禦王事齊王舅也晉及魯衛王母弟

也楚是以無分而彼皆有今周與四國服事君王豈其

愛鼎王曰昔我皇祖伯父昆吾舊許是宅

陸終氏生六子長曰昆吾

少曰季連季連楚祖故謂昆吾爲伯父昆吾故居許地

今鄭人貪賴其田我若求

之其與我乎對曰與君王哉周不愛鼎鄭敢愛田王曰

昔諸侯遠我而畏晉今我大城陳蔡不羹賦皆千乘諸

侯其畏我乎對曰畏君王哉是四國者專足畏也又加

之以楚敢不畏君王哉工尹路請曰君王命剝圭爲鉞

秘敢請命王入視之析父謂子革吾子楚國之望也今

與王言如響國其若之何子革曰摩厲以須王出吾刃
將斬矣王出復語左史倚相趨過王曰是能讀三墳五
典八索九丘對曰臣嘗問焉昔穆王欲肆其心周行天
下將皆必有車轍馬跡焉祭公謀父作祈招之詩以止
王心王是以獲沒于祗宮臣問其詩而不知也若問遠
焉其焉能知之王曰子能乎對曰能其詩曰祈招祈周司馬
世掌甲兵之職招其名方之悵悵貌安和式昭德音思我
諫游行故指司馬官而言王度式如玉式如金重取堅形民之力而無醉飽之心之國

用民當隨其力任如金冶之器隨器而制
形故言形民之力去其醉飽過盈之心
王揖而入饋

不食寢不寐數日不能自克以及於難仲尼曰古也有
志克己復禮仁也信善哉楚靈王若能如是豈其辱於
乾谿
十三年楚子之爲令尹也殺大司馬薳掩而取

其室及即位奪薳居田遷許而質許圍蔡洧有寵於王
王之滅蔡也其父死焉王使與於守而行申之會越大
夫戮焉王奪闕韋龜中驪

邑名

又奪成然邑而使爲郊尹

蔓成然故事蔡公故薳氏之族及薳居許圍蔡洧蔓成

然皆王所不禮也因羣喪職之族啓越大夫常壽過作

亂圍固城克息舟城而居之觀起之死也其子從在蔡

事朝吳

蔡大夫
聲子子

曰今不封蔡蔡不封矣我請試之以蔡

公之命召子干子皙及郊而告之情強與之盟入襲蔡

使坎用牲加書而速行已徇於蔡曰蔡公召二子將納

之與之盟而遣之矣將師而從之蔡人將執之朝吳曰

二三子若能死亡則如違之以待所濟若求安定則如

與之

與蔡公

衆曰與之乃奉蔡公召二子而盟于鄧依陳

蔡人以國

國陳蔡而依之

楚公子比

干公子

黑肱

皙公子

弃疾

蔓成然蔡朝吳帥陳蔡不羹許葉

始涉

之師因四族之徒

遂氏許圍蔡

以入楚及郊陳蔡欲爲名故請爲武軍

欲築

洧蔓成然

壘壁示後人爲復讎之名

蔡公曰役病矣請藩而已乃藩爲軍蔡公

使須務牟與史狎

皮佳

先入因正僕人殺大子祿及公子

罷敵

正僕大公子近官

公子比爲王黑肱爲令尹弃疾爲司馬使

觀從從師于乾谿而告曰先歸復所後者劓師及訾梁

而潰王聞羣公子之死也自投于車下曰人之愛其子

也亦如余乎侍者曰甚焉小人老而無子知擠于溝壑
矣右尹子革曰請待于郊以聽國人王曰衆怒不可犯
也曰若入於大都而乞師於諸侯王曰皆叛矣曰若亡
於諸侯以聽大國之圖君也王曰大福不再祇取辱焉
然丹乃歸于楚王汭夏將欲入鄢芋尹無宇之子申亥
曰吾父再奸王命王弗誅惠孰大焉君不可忍惠不可
弃吾其從王夏五月王縊于芋尹申亥氏申亥以其二
女殉而葬之觀從謂子于曰不殺弃疾雖得國猶受禍

也子干曰余不忍也子玉曰人將忍子乃行國每夜駭
曰王入矣乙卯夜弃疾使周走而呼曰王至矣國人大
驚使蔓成然走告子干子皙曰王至矣國人殺君司馬
將來矣衆怒如水火焉不可爲謀二子皆自殺丙辰弃
疾即位名曰熊居葬子干于訾實訾教殺囚衣之王服
而流諸漢乃取而葬之以靖國人封陳蔡復遷邑致羣
賂施舍寬民宥罪舉職召觀從曰唯爾所欲從教子干
殺弃疾今
召用之明在對曰臣之先佐開卜乃使爲卜尹他年芋
君爲君之義

尹申亥以王樞告乃改葬之初靈王卜曰余尚得天下
不吉投龜詬天而呼曰是區區者而不余畀余必自取
之民患王之無厭也故從亂如歸初共王無冢適有寵
子五人無適立焉乃大有事于羣望而祈曰請神擇於
五人者使主社稷乃徧以璧見於羣望曰當璧而拜者
神所立也既乃與巴姬密埋璧於大室之庭使五人齊
而長入拜康王跨之靈王肘加焉子干子皙皆遠之平
王弱抱而入再拜皆厭於紐闕韋龜屬成然焉子干歸

韓宣子問於叔向曰子干其濟乎對曰難曰同惡相求如市賈焉何難對曰無與同好誰與同惡取國有五難有寵而無人一也有人而無主二也有主而無謀三也有謀而無民四也有民而無德五也子干在晉十三年矣晉楚之從不聞達者可謂無人族盡親叛可謂無主無譽而動可謂無謀爲霸終世可謂無民亡無愛徵楚無念之可謂無德有楚國者其弃疾乎君陳蔡城外屬焉者穿封戌死苛慝不作賊盜伏隱私欲不違民無怨心先遂并領陳

神命之國民信之芊姓有亂必季實立楚之常也獲神

一也有民二也令德三也寵貴四也居常五也

季弃疾有

五利以去五難誰能害之子干之官則右尹也數其貴

寵則庶子也以神所命則又遠之其貴亡矣

位不尊

其寵

弃矣

文役

民無懷焉國無與焉

無內主

將何以立宣子曰齊

桓晉文不亦是乎對曰齊桓衛姬之子也有寵於僖有

鮑叔牙賓須無隰朋以爲輔佐有莒衛以爲外主有國

高以爲內主從善如流下善齊肅不藏賄不從欲施舍

不倦求善不厭是以有國我先君文公狐季姬之子也

有寵於獻好學而不貳生十七年有士五人

狐偃趙衰
顓頊魏武

子司空

有先大夫子餘子犯以爲腹心有魏犢賈佗以

爲股肱有齊宋秦楚以爲外主有欒卻狐先以爲內主

亡十九年守志彌篤惠懷弃民民從而與之獻無異親

民無異望天方相晉將何以代文此二君者異於子干

共有寵子國有與主

弃疾

無施於民無援於外去晉而不

送歸楚而不逆何以冀國

鄭子皮授子產政

鄭子皮授子產政辭曰國小而偪族大寵多不可爲也
子皮曰虎帥以聽誰敢犯子子善相之國無小小能事
大國乃寬三十一年子皮欲使尹何爲邑子產曰少
未知可否子皮曰愿吾愛之不吾叛也使夫往而學焉
夫亦愈知治矣子產曰不可人之愛人求利之也今吾
子愛人則以政猶未能操刀而使割也其傷實多子於
鄭國棟也棟折榱崩僑將厭焉敢不盡言子有美錦不

使人學製焉大官大邑身之所庇也而使學者製焉其
爲美錦不亦多乎僑聞學而後入政未聞以政學者也
若果行此必有所害譬如田獵射御貫則能獲禽若未
常登車射御則敗績厭覆是懼何暇思獲子皮曰善哉
吾聞君子務知大者遠者小人務知小者近者我小人
也衣服附在吾身我知而慎之大官大邑所以庇身也
我遠而慢之微子之言吾不知也他日我曰子爲鄭國
我爲吾家以庇焉其可也今而後知不足自今請雖吾

家聽子而行子產曰人心之不同如其面焉吾豈敢謂
子面如吾面乎抑心所謂危亦以告也子皮以爲忠故
委政焉子產是以能爲鄭國 昭五年鄭罕虎如齊娶
于子尾氏晏子驟見之陳桓子問其故對曰能用善人
民之主也 十三年秋諸侯會于平丘子產歸未至聞
子皮卒哭且曰吾已無爲爲善矣唯夫子知我

子產爲政

子產爲政有事伯石賂與之邑子大叔曰國皆其國也

奚獨賂焉子產曰無欲實難皆得其欲以從其事而要其成非我有成其在人乎何愛於邑邑將焉往子大叔

曰若四國何子產曰非相違也而相從也四國何尤焉

鄭書有之曰安定國家必大焉先姑先安大以待其所

歸既伯石懼而歸邑卒與之伯有既死命伯石爲卿辭

大史退則請命焉復命之又辭如是三乃受策入拜子

產是以惡其爲人也使次已位子產使都鄙有章

車服有辨

上下有服

服不踰相踰

田有封洫廬井有伍大人之忠儉者從

而與之泰侈者因而斃之豐卷將祭請田焉弗許曰唯
君用鮮衆給而已子張怒退而徵役攻子子皮逐豐卷
豐卷奔晉子產請其田里請不沒入三年而復之反其田里
及其入焉從政一年輿人誦之曰取我衣冠而褚之取
我田疇而伍之孰殺子產吾其與之及三年又誦之曰
我有子弟子產誨之我有田疇子產殖之子產而死誰
其嗣之

三十一年

穆叔劉定公秦后子知趙孟之死

澶淵之盟穆叔至自會見孟孝伯語之曰趙孟將死矣其語偷不似民主且年未盈五十而諄諄焉如八九十者弗能久矣若趙孟死爲政者其韓子乎吾子盍與季孫言之可以樹善君子也晉君將失政矣若不樹焉使蚤備魯旣而政在大夫韓子懦弱大夫多貪求欲無厭齊楚未足與也魯其懼哉孝伯曰人生幾何誰能無偷朝不及夕將安用樹穆叔出曰孟孫將死矣吾語諸趙

孟之偷也而又甚焉又與季孫語晉故季孫不從及趙
文子卒晉公室卑政在侈家韓宣子爲政不能圖諸侯
魯不堪晉求讒慝弘多是以有平丘之會秋孟孝伯卒

昭元年楚公子圍聘于鄭遂會于虢尋宋之盟也夏

四月趙孟叔孫豹曹大夫入于鄭鄭伯兼享之子皮戒

趙孟趙孟賦瓠葉子皮遂戒穆叔且告之穆叔曰趙孟

欲一獻

義取薄物
故知一獻

子其從之及享具五獻之籩豆於幕

下趙孟辭曰武請於冢宰矣乃用一獻趙孟爲客禮終

乃宴穆叔賦鵲巢

喻晉君有國趙孟治之

趙孟曰武不堪也又賦

采蘩

義取薄物以薦公侯享其信也

曰小國爲蘩大國省穡而用之其

何實非命子皮賦野有死麕之卒章趙孟賦常棣且曰

吾兄弟比以安厖也可使無吠穆叔子皮曹大夫興拜

舉兕爵曰小國賴子知免於戾矣飲酒樂趙孟出曰吾

不復此矣天王使劉定公勞趙孟於潁館於雒汭劉子

曰美哉禹功明德遠矣微禹吾其魚乎吾與子弁冕端

委禮以治民臨諸侯禹之力也子盍亦遠績禹功而大

衣

庇民乎對曰老夫罪戾是懼焉能恤遠吾儕偷食朝不謀夕何其長也劉子歸以語王曰諺所謂老將知而老及之者其趙孟之謂乎爲晉正卿以主諸侯而儕於隸人朝不謀夕弃神人矣神怒民叛何以能久趙孟不復年矣神怒不歆其祀民叛不即其事祀事不從又何以年秦后子適晉見趙孟趙孟曰秦君何如對曰無道趙孟曰亡乎對曰何爲一世無道國未艾也國於天地有與立焉不數世淫弗能斃也趙孟曰天乎對曰有焉鍼

聞之國無道而年穀和熟天贊之也鮮不五稔趙孟視
蔭曰朝夕不相及誰能待五后子出曰趙孟將死矣主
民翫歲而愒日其與幾何晉侯有疾求醫於秦秦伯使
醫和視之曰疾不可爲也是謂近女室疾如蠱非鬼非
食惑以喪志良臣將死天命不祐公曰女不可近乎對
曰節之先王之樂所以節百事也故有五節五聲之節遲速
本末以相及中聲以降五降之後不容彈矣先王之樂得中聲聲
成五降而息降罷退於是有煩手淫聲惱堙心耳乃忘平和君子

弗聽也物亦如之至於煩乃舍也已無以生疾君子之

近琴瑟以儀節也非以惱心也天有六氣降生五味發

爲五色徵爲五聲淫生六疾六氣曰陰陽風雨晦明也

分爲四時序爲五節過則爲菑陰淫寒疾陽淫熱疾風

淫末疾雨淫腹疾

濕爲洩注

晦淫惑疾明淫心疾

晝思慮過則心勞生

疾

女陽物而晦時

女隨男故言陽物

淫則生內熱惑蠱之疾今

君不節不時能無及此乎出告趙孟趙孟曰誰當良臣

對曰主是謂矣主相晉國於今八年晉國無亂諸侯無

闕可謂良矣和聞之國之大臣榮其寵祿任其大節有
 災禍興而無改焉必受其咎今君至於淫以生疾將不
 能圖恤社稷禍孰大焉主不能禦吾是以云也趙孟曰
 何謂蠱對曰淫溺惑亂之所生也於文皿蟲爲蠱器受蟲害
 者爲蠱穀之飛亦爲蠱在周易女惑男風落山謂之蠱蠱三三
巽下艮上艮爲少男巽爲長女少男說長女非匹是惑也皆同物也趙孟曰良醫也
 厚其禮而歸之十二月趙孟烝于溫庚戌卒

晏子知姜弱嬀氏始昌

齊子尾害閭丘嬰欲殺之使帥師以伐陽州我問師故
夏五月子尾殺閭丘嬰以說于我師工倭灑渚竈孔虺
賈寅出奔莒出羣公子 昭二年韓宣子如齊納幣見
子雅子雅召子旗宣子曰非保家之主也不臣見子尾
子尾見彊宣子謂之如子旗大夫多笑之唯晏子信之
曰夫子君子也君子有信其有以知之矣 三年公孫
竈卒司馬竈見晏子曰又喪子雅矣晏子曰惜也子旗
不免殆哉姜族弱矣而嬀將始昌二惠競爽猶可又弱

一个焉姜其危哉 八年七月子尾卒子旗欲治其室

丁丑殺梁嬰

子尾家宰

逐子成子工子車

公孫捷

而立子良氏

之宰其臣曰孺子長矣而相吾室欲兼我也授甲將攻

之陳桓子助之或告子旗子旗如陳氏桓子將出聞之

而還游服

常服

而逆之請命對曰聞彊氏將攻子子聞諸

曰弗聞子盍亦授甲無字請從子旗曰子胡然彼孺子

也吾誨之猶懼其不濟吾又寵秩之

謂爲宰

其若先人何

子盍謂之周書曰惠不惠茂不茂康叔所以服弘大也

桓子曰頃靈福子吾猶有望遂和之如初 十年欒高

氏皆耆酒信內多怨彊於陳鮑氏而惡之有告陳桓子

曰子旗子良將攻陳鮑亦告鮑氏桓子授甲見鮑文子

亦授甲矣使視二子則皆將飲酒陳鮑方睦遂伐欒高

氏子良曰先得公陳鮑焉往遂伐虎門晏平仲端委立

于虎門之外四族召之無所往其徒曰助陳鮑乎曰何

善焉助欒高乎曰庸愈乎然則歸乎曰君伐焉歸公召

之而後入公卜使王黑以靈姑鉦公館率吉請斷三尺焉

而用之五月庚辰戰于稷轅高敗又敗諸莊又敗諸鹿
門轅施高彊來奔陳鮑分其室晏子謂桓子必致諸公
讓德之主也讓之謂懿德凡有血氣皆有爭心故利不
可強思義爲愈義利之本也蘊利生孽姑使無蘊乎可
以滋長桓子盡致諸公而請老于莒桓子召子山私具
幄幕器用從者之衣屨而反棘焉子商亦如之而反其
邑子周亦如之而與之夫子邑名三子三十一年所逐公子反子城子
公公孫捷而皆益其祿凡公子公孫之無祿者私分之

邑國之貧約孤寡者私與之粟曰詩云陳錫哉周能施也桓公是以霸公與桓子莒之旁邑辭穆孟姬爲之請高唐陳氏始大

君子知昭公不能終

六月辛巳公薨立胡女敬歸之子子野九月癸巳卒毀也立敬歸之弟齊歸之子稠直穆叔不欲曰大子死有母弟則立之無則立長年鈞擇賢義鈞則卜古之道也非適嗣野子何必弟之子且是人也居喪而不哀在感而

有嘉容是謂不度不度之人鮮不爲患若果立之必爲季氏憂武子卒立之比及葬三易衰衰衽如故衰於是昭公十九年矣猶有童心君子是以知其不能終也

子服惠伯知滕成立將死

冬十月滕成公來會葬愴而多涕子服惠伯曰滕君將死矣怠於其位而哀已甚兆於死所矣能無從乎 昭三年滕子原卒

子產如晉壞牆垣

公薨之月子產相鄭伯以如晉晉侯以我喪故未之見也子產使盡壞其館之垣而納車馬焉士文伯讓之曰敝邑以政刑之不修寇盜充斥是以令吏人完客所館高其閭閥厚其牆垣以無憂客使今吾子壞之雖從者能戒其若異客何對曰敝邑褊小介於大國誅求無時是以不敢寧居悉索敝賦以來會時事逢執事之不問而未得見又不獲聞命未知見時不敢輸幣亦不敢暴露其輸之則君之府實也非薦陳之不敢輸也其暴露

之則恐燥濕之不時而朽蠹以重敝邑之罪僑聞文公
之爲盟主也宮室卑庠無觀臺榭以崇大諸侯之館館
如公寢庫廡繕修司空以時平易道路圻人以時塏館
宮室諸侯賓至甸設庭燎僕人巡宮車馬有所賓從有
代巾車主脂轄隸人牧圉各瞻其事百官之屬各展其
物公不留賓而亦無廢事憂樂同之事則巡也行之教其
不知而恤其不足賓至如歸無寧菑患不畏寇盜而亦
不患燥濕今銅鞮之宮數里而諸侯舍於隸人門不容

車而不可踰越盜賊公行而天癘不戒賓見無時命不可知若又勿壞是無所藏幣以重罪也敢請執事將何所命之若獲薦幣修垣而行君之惠也敢憚勤勞文伯復命趙文子曰信使士文伯謝不敏焉晉侯見鄭伯有加禮厚其宴好而歸之乃築諸侯之館叔向曰辭之不可以已也如是夫子產有辭諸侯賴之若之何其釋辭也詩曰辭之輯矣民之協矣辭之懌矣民之莫矣其知之矣

北宮文子謂鄭有禮

北宮文子相衛襄公以如楚宋之盟故也過鄭印段廷

于勞于斐林如聘禮而以勞辭文子入聘子羽爲行人

馮簡子與子人叔逆客事畢而出言於衛侯曰鄭有禮

其數世之福也其無大國之討乎詩云誰能執熱逝不

以濯禮之於政如熱之有濯也濯以救熱何患之有子

產之從政也擇能而使之馮簡子能斷大事子大叔美

秀而文公孫揮能知四國之爲而辨於其大夫之族姓

班位貴賤能否而又善爲辭令裨諶能謀謀於野則獲
謀於邑則否鄭國將有諸侯之事子產乃問四國之爲
於子羽且使多爲辭令與裨諶乘以適野使謀可否而
告馮簡子使斷之事成乃授子大叔使行之以應對賓
客是以鮮有敗事北宮文子所謂有禮也

鄭子產不毀鄉校

鄭人游于鄉校以論執政然明謂子產曰毀鄉校如何
子產曰何爲夫人朝夕退而游焉以議執政之善否其

所善者吾則行之其所惡者吾則改之是吾師也若之何毀之我聞忠善以損怨不聞作威以防怨豈不遽止然猶防川大決所犯傷人必多吾不克救也不如小決使道不如吾聞而藥之也然明曰蔑也今而後知吾子之信可事也小人實不才若果行此其鄭國實賴之豈唯二三臣仲足聞是語也曰以是觀之人謂子產不仁吾不信也

春秋左氏傳事類始末卷第三